

四庫全書

集部

欽定四庫全書

集部

須溪集卷三

詳校官庶吉士臣張溥

主事臣呂雲棟覆勘

謄錄舉人臣李憲喬

欽定四庫全書

須溪集卷三

宋 劉辰翁 撰

記

社倉記

孫翁先生無位而一食三歎無食而急人朝飢他日懷
編書示予獨欣然如有飽色曰此喻邑西溪劉氏社倉
約也人人有此心亦人人能之而不為蓋吾與子之所
共媿也彼將靳予記其倉予欲傳其約予鄉自是常慨

然為來客誦之而未及記而先生卒然其邑彭君幼遠猶望焉為是記來也義哉彭君來廬陵豈三數既恨不可得則委先生諾責於予予潛然受之曰此先生志也前年吾鄉旱既甚大家逆勸分閉餘粟冬春無所得糴鄉人之攜持叩關者累累不能歸則徘徊浮橋間中江赴焉市而奪餅餌盤殮以飽者起責之金則含哺而走橋亦中流赴焉蓋橋者告余曰夜夫婦相泣既而水聲如投石者不絕常數人及旦來者乃已殆不可數也彼

特中人無策羞見閭巷故出此而官以道殣告者一朝而百餘不與也于時孫翁流涕解衣易米更相為粥以食餓者游手四望取饜而頽簷曲巷衣冠困敝陰雨連月不能出者又未有省焉其後上捐義倉和糴數萬石深山長谷幸忍須臾食新矣暨鄉都轉致强者乾沒偽占弱者擇輕受少獨區區藉虛聲出藏粟耳此無他無社倉之故也使廬陵所在有社倉者何待後時展轉望施天上亦或及或不及乃知政術不存倉卒補救雖仁

心仁聞無益今世訾無能為者必曰士士亦妄自菲薄如西溪劉氏才二三十人人貸穀二三十石或百石二百石止然既得千七百餘石貸之三歲歲收息視鄉人殺其一再歲殺其二三歲則穀本可償矣息自為本矣穀則君穀而鄉人之舉子者當能言矣又三歲十歲以至于無窮子子孫孫與是倉終始而穀亦不可勝用矣此社倉法也夫數石之穀節於口腹豈人所不能哉士皆若此何事不可為喻西無富家劉固士族僅足爾聞

社倉者不暇自量沛然各修其可願而里中窮士如彭君者又為人奔走後先控極為助變之憐物不知誰憐變者亦甚盛心矣吾廬陵其獨無西溪劉哉顧其力有十西溪者亦乃與吾等無異可嘆耳天下之重未必一人所能任也人為其所可能而不可能者從是舉矣宇宙一心也人類以來所不至于生意中絕者政自相依耳聖賢之於斯民也同在猷畝之中而懷已飢之思極推內之恥彼不自累人固不得而累之何為皇皇焉起

匹夫之志勤身死力經營天下之大憂及萬世其遺後人以耕且食者皆其業也寧使自有餘而已緒前業救民命則陋巷之心勞于平世之心今吾百畝于此不待胼手胝足躬耕播種直推而與之共食其視古人用心與力之勞亦無幾耳而猶以為難也以吾廬陵之所難故知西溪之風為不可及也人以善小不足為誕曰濡煦而已孰知斗升之水有大于西江者哉以吾廬陵之所睹故知西溪活者衆也嗟乎人命亦大矣向之死者

非盡鰥寡孤獨也自鳥獸之羣猶知愛其死聞其悲鳴者猶為之傷心焉況同類並生之民父母妻子臨流恐訣則亦見斯世之無足懷而斯人之無足告耳其不大可哀與西溪有社倉西溪之人未病也拯道亦貴豫耳今吾痛定思痛而亡具猶前日吾廬陵豈獨愧西溪氏哉抑吾愧彭君矣吾愧彭君矣或曰劉族固多賢君子倉不修且弊來者未可知安知劉氏之子孫不德色于指廩乎其又有能扶植而擴充之者乎予曰噫過矣天

地能生而不能使其無飢父母能生而不能使其無困
於天地之不能而能之者是倉也壺殮二士人報也孝
子慈孫天報也吾見西溪之門駟馬高蓋鐘鳴鼎食潤
及九里則有之矣世俗之所慮信天道者所不慮也是
倉名堂曰集義翼以兩廊六倉其積可萬石為是倉者
奉新監酒劉夢麟少游甫而少游曰非我也伊吾族之
力彭君名程其父子屢貢其鄉亦佳士

蘭玉書院記

世稱佳子弟如芝蘭玉樹本謝家語也想見封胡羯末
輩固當風流可愛徃徃不可櫻以世務然倉卒敵百萬
騎臨淮聲震都下名臣宿將安在丞相獨遣塔庭三少
年禦之上流老桓至有左衽之嘆亦疑其不更事甚使
在今人書生語三日不能定既定臨事失措三子乃冒
然而起談笑麾之無成謀亦無懼色如干將出匣遇物
必割如豪鷹起乎秋風天馬發于西極未必芝蘭玉樹
浮脆美觀比也古人家庭聞見絕與紙上傳習形似者

不同其浩然有養出乎志行乎素慷慨自任視利害如
白黑春秋戰國名卿大夫非公族則世家其從容應對
出入戰陣以為常事後來君臣多亡命共事崛起粗俗
無復禮樂儒者又寒儉狷狹才疎膽薄受任輒敗他時
曹魏父子稍稍賦詩橫梁間則共相怪其文采將畧天
分不可及蓋氏衰族混之餘草間無英物久矣科目興
類起徒步致富貴然再世則不可復賤衣冠文雅化及
羣從高者矜持自喜下者輕俠不還其家世何如昔人

而區區求如江左風氣亦不可得矣異哉欲觀世道視
故家欲觀故家驗學術三百年間中原如韓呂典型議
論為鉅人長者過江如五峯致堂南軒諸賢又磨礪精
密希顏而肖孔彼功名之士乃當羞愧俛首不復敢望
政未知諸賢當事變所就何似而學術遠矣嗟夫子弟
固難得佳父兄亦復未易今為父兄者皆願其為此勿
為彼至近年又惟以科第不失舊物為難雖中朝盛事
不過如此耳此世道之嘆也吾劉氏出安成未知龍雲

先世同異如龍雲劉氏之詩書文物不其難與盛哉雖
四忠之孫子曷京焉自著作公第元豐中詞科號龍雲
先生先生以來仕至二千石與為奉常弟子貢鄉漕者
世不絕今為盛或時兄弟數人比肩立非號稱甲乙則
名位適相似以是長上玩之如芝蘭玉樹焉其名家塾
曰蘭玉父兄意也某與蘭玉諸少游見其辛苦為名儒
篤實有世用因為言古家族人物之高下蓋屢嘆之不
足尚庶幾有所感發擇而勉焉不至為晉人之清談而

止抑晉人非清談不直晉也安石在東山時亦子弟耳
觀其徧詩諸將自托與幼度勤履屐間小物家法政爾
人言王謝子弟自別者尚未知王謝子弟惡識古人

蹊隱堂記

龍泉康氏為其子讀書之齋種桃李焉周遭可里所霞
蒸雪積入境疑仙春流浮遠想見千樹青陰繞屋時聞
誦絃芳時過客不能賦即已能賦未有不眷然問誰氏
也于是有大人先生取司馬子長李將軍贊語命之曰

蹊隱或疑之蹊者山間之跡昔未有者也崎嶇犖确不用而又將塞也何康之蹊亦若是乎予曰不然彼披榛莽排藜藿入而與猿狖爭出而與鹿豕羣忽焉草合不見前轍由行者少也若桃李則無不好也雖深山長谷溪回路斷苟有目者慮無不極其處徃復袂相屬如通道焉繇世之好者衆也曰然則客之得其蹊者千百而隱何居予笑曰子以為隱者之隱必孤山之梅小山之桂竹林之密密蘭畹之幽幽乎必去人愈遠于人所不

好而後隱則丹崖之渾沌絕碣之沉淪雖今無聞可也
蓋富春之臺草堂之墟吾嘗褰裳過之歎曰介推母子
之言誰則聞之而又安知其繇上也昔者是山也樵斧
之所攀援長鏡之所失徑自諸君子擇於是息於是而
蹊生焉故凡隱者皆蹊也亦不能不蹊也蹊而桃李焉
桃李而邂逅焉未嘗不與人混未嘗求與人異未嘗不
與人同樂顧物之紛華盛麗舉無足以易此而吾老是
鄉矣彼仙人者則不可知若古有道之士種花食菜實

未離乎人間而亦不可榮以祿殆真隱矣桃李何負于
隱哉方時艷陽華如桃李能不顧省而窮山枯槁者晚
而遠焉彼誠有樂乎彼而名之所歸政復不能不累乎
彼也人之情性隱者詎相遠哉或又曰康氏之子功名
方興而豈有意于隱耶而獨為此名也余曰然康氏之
教其子則有意矣今夫靜對軒窓行啜花下生意自然
一舉目而足不待遊嬉遠想而光陰華悴感發無窮則
學之所得或在是矣園林如此他時子孫仕宦倦而思

歸乃與松菊留情居然無異則亦茲花之為助也何傷
於出而何憾於隱凡卉盛衰未嘗不與桃李同近世以
名品相高謂晚歲為長年風霜為清苦春葩浩蕩黯然
羞沮誰與領此而我獨取之則我希矣彼以桃李為俗
吾亦不能不以彼為俗問者喜曰異哉夫子之言之也
為蹊記可乎余曰雖然蹊有幾世方險艱入者為捷徑
出者為畏途今之隱者其非後之赫赫者耶桃李不言
予不得不言

梅軒記

古貴梅未有以其華者至近世華特貴而其實乃少見用此古今之異也然其盛也亦不過吟詠者之口耳未有以德也數年來梅之德徧天下余嘗經年不見梅而或坡或谷或溪或屋者其人無日而不相遇也徃徃字不見德而號稱著焉某梅也即其人可知也如安成彭梅軒與余遊每見之如見梅焉是其德也其軒求吾記嗟乎予也為梅役未已也予昨也為分寧鄭賦梅軒詩

今日又為子之梅軒記也何梅之於余密也予何以記
諸記梅乎記君乎夫梅舉相似也君梅似也君起于素
封之地而呻吟乎冰雪之窓癯然如不自勝澹然欲逃
名而人不我舍不知斯芳之藉我乎其山空澗落無人
乎歲晏彼不我即則我往即之乎吾嘗謂梅者使其生
於暄淑之景而立乎桃李之蹊雖儵然欲以其潔獨而
爭妍者有其色好懿者無其人焉是其獨也時也好之
者亦時也若二三月之間則莫之好矣物莫盛於東南

而其盛於冬者以其鍾南方之氣也故梅尤盛於南而
號之者皆南人也是其盛也地也號之者亦地也若出
於闕隴也而亦號之則異矣雖然吾嘗觀梅於當塗之
野老枝如龍到地復起高花照日者每枝而如蓋焉相
傳昔年蜀人載之雪山之下泛瞿塘而東望孤山近矣
而不能進而留之此也是其地也又特以其蜀也又聞
武陵官梅一株如屋環其下可百客武陵人劉海蟾嘗
煉於此此樹與海蟾俱不死者是其獨也又有在受形

草木之外也嗟乎君之梅能如當塗之大且疎又能如
武陵之高之壽則是軒也其亦庶乎有以異乎彼矣

存厚堂記

顏士元宗大名其堂曰存厚而問記於余予曰君非能
自為厚也厚生於所積人未有無所積也雖吾與君不
遇然不耕獲不泯絕以有今日者皆前人之餘也自行
四方所見朱門賓客或憐我而食我今蕭條零落問故
人子至無存者而韋氏之藏經長卿之售賦新豐之授

草乃由寂寂見收傳家其敢謂吾能哉抑吾祖宗三世
於此天念之矣太虛百年為一息視人間再三世猶屈
伸肘耳化機不相待而待者常遲之此天道之所以茫
茫而人事之所以尤可恨也吾與君中立於過化之蹊
而饋漿於寄食之旅安知子孫來者不笑人無能而騁
其所大欲乎而盛衰之多態亦在是矣吾且為君徃復
言之君所為厚者其能賑人之飢急人之病如陶朱公
再散千金乎無也其能有尺寸之柄指麾反掌如古人

全一城辨一獄活千人者乎無也人胡能有德於天而況士之善也不過庸言行寡過而已又安得有餘與不享而望其所甚奢責其所不報無亦惟是犯而不校貧而無怨遯而無悶為庸人孺子之所易侮意者造物之所尤憐者乎而君之所為厚者從是積矣夫難平者何必其平哉政使為善朝種暮穫若左券相付然即其取於天者無餘矣而何子孫他日之望小大不同未有無所積也禹稷躬稼太王去邠晉重乞塊伯諸侯孝公見

擯取河外楚三戶趙遺孤物之興也皆若此雖君之顏
氏孰非陋巷之先師晚食之處士留以遺後之人乎天
之於魯公蓋卷卷矣今吾以宗大為食厚報耶則君窮
特類我抑君他日駟馬高蓋連阡陌擬封君未可知能
使君孫子悔其文采氣馘如宗大之循循如中人者乎
能毋忘疎貧植遺弱如宗大之於鄉黨朋友親戚者乎
吾見世人憑陵夸奪躡籍豪縱者類以為所自能致往
往竭其強弩之力機張而不弛未有歆然如其初者也

而昔人之所存亦從是無餘矣士之賤也易為下也而
人情有甚難者焉賤且貴其為下也始難矣而其勢則
甚易也夫厚豈有涯哉吾今雖自以為厚耶然已媿於
昔人矣厚不自知也將由彼薄故我厚也一念之所積
人不能知而天則知之吾何以知顏氏之積哉顏氏有
宗大可知已存至於宗大愈厚矣宗大之孫子未可知
也未可知也吾為宗大記之

泉山記

許嗣翁家四壁容闔扉右侯門左賈區陋如連樓陳居
附隅而求余大書泉山揭焉曰吾泉人也不可以不識
也願記之示吾子孫按許氏祖子春者事晦翁從益公
徙廬陵晦翁派新安生延平徙建陽而號精舍紫陽者
記鄉關也今人每每以異鄉名其居者學晦翁也苟有
血氣心知依風首丘豈能忘本抑祖孫三世百年於此
淒其追遠跂予望之不一見其處政使子厚得歸善和
宅無恙而兒童之吮吮者皆楚語矣渡桑乾者得不復

思并州乎宇宙雖大惟思無窮凡思之不能自己者惟始念耳燕人弱喪過晉而疑於燕流涕泣然及真見先人之廬冢悲心更微君思泉未見泉也未見如將見焉既見不思矣其子孫來者之不知雖未見亦不思矣人生逆旅前境皆幻謂是居泉也泉猶目前也夫孰非父母之邦雖然泉富州也幸君未識泉為君燕說吾聞泉人言泉多颶風風起少年狂者據圓箕空中繫長繩縱之乘扶搖而上如飛篷如紙鳶意其極滄海之觀而不

知其所底止也君未嘗知泉聞吾言也得不啞然而笑
及其至泉也又能不笑吾以未見疑所見乎夫逍遙之
遊秋水之觀釣天化人之想得失皆若此矣君毋謂予
不實近年蜀士僑東南雖僧廬寓蜀扁金陵諸橋名坊
巷大抵東京舊也士於故鄉不忘本以一室推天下固
當慨然然而念者鮮矣吾嘗賦匪風匪風之不可見驟
而歌甫田噫孰知甫田之悲有甚於周道之徘徊者乎
記君泉山念我遠者君廬七尺掃寬三尺著吾記室雖

陋毋自隘充是心也其自泉而上益有當念者焉夫許大岳之肯也

安齋記

客有言安齋之為人也被服仁義強勉學問如癯儒陋巷兢兢寡過歉然嚴師保之在其側不窘於此矣而謂之安齋何居竊惑之余於是聞而聳然曰子言胡君之為人也余幸乃得胡君之為人也余未識胡君胡君安矣今夫垂紳佩玉準繩規矩左右斯須不敢失墜聖與

賢之所以不愧不怍而有餘樂者使小夫蹠人易地而處猶援狙而周公服之乃其所大戚也而況惡衣服菲飲食辭尊而居卑辭富而居貧久幽不改其操見危則致其命彼將頻顛而視之何自苦乃爾而由君子即之吾心揆之義理有寧死而後得所安者將為彼小人之所為耶又不能一朝居也而彼未嘗不自以為安也華居美食妖聲麗色用物多而使令足其悖入厚積猶足以遺其子孫也其羞原憲而拙首陽也宜矣然而無是

理也體之所安者未必心之所安也君子之所安必小人之所不安也未聞君子而又安小人之所安也雖然猶有君子而安於小人之所不敢安者蓋昔者宰予之問短喪也子曰食夫稻衣夫錦於女安乎曰安予也身遊聖門在言語之科汙不至薄其所厚試使三尺之童少知義理率然而請必不敢復以曰安對而予也安之豈獨無人心哉此小人之所不敢安也然吾視世之君子未嘗不為宰予之所安也被予也乃獨以其言為萬

世笑嗟夫此古人之所不隱也其使後人無疑乎三年之喪則自予始也此予意也此其在言語之科也後之為言語者則異於是矣悲夫客曰吾聞君言於吾心亦有如不安者他日為胡君誦之胡君曰某聞病有難知有不能自言者吾子受人之微言以惠貺我是使我得復起為人也請書之以毋忘藥石之自

本室菴記

余年七八與西家二三兒共受書屬於薊城曾深甫

深雨垂髯映墨黑盡日樹筆髯間倪首抄六經他解附
注傍每禁字如蟻計平生若此何啻百餘萬字今年七
十餘皓然禿翁不知此本束在何處後來新義何限舊
註豈復更容入耳忽忘展卷斑斑茫然隔今世昨夢空
山歲晚歌不成章而問童子然老無受簡之兒吟有白
頭之妻喟然嘆曰五十年場屋富貴不早來功名事去
矣蕭然四壁讀更萬卷無字用髯記西方偈言不多
與我意合遂名所居曰本空一日杖出城舉手裂指無

他求求余記刻壁間死即埋以為銘余笑曰噫晚矣然
士方少時志科舉辛勤過古人徒欲以記問工時輩不
知心血之耗及其得也或陸沈州縣或流落嶺塞坐念
場屋何心至此就使奇遇如礮史晚達如齊人壽駢如
柱下相君其罟如宰如亦無異土偶之復於土而其入
苦不自已以此方彼不猶早乎百年未得盡為善亦不
足初心誰負晚背其師方泊然依彼氏以老寧不冀來
日之有聞而手循餘髮故將倒行樂嬰兒之無知也則

先生之志其不使余悲乎蓋死而可悲者未有若無成之士而士之可悲者又未有若記問之為誤也是菴之設方求釋此悲者然以吾記記於斯得無猶有文字之習吾為此記猶如食蟹動人風氣抑使讀吾記者撫然長吁慘然四顧一雪其心之所甚痛而後俛焉謝去浩然無復意者而樂亦不可言也余年未四十執筆數千萬言為人役未休政坐童時屬對始悟彼本空求吾不朽豈儒墨相用固爾耶先生妻莊氏貧而樂壽各未有

艾其歸先後不可知作山曰小孤之山屬余記其處焉
且志曰同穴夫知性之空矣而未有以易身之為患也
則儒者之道其終不能無情矣乎先生名子淵莊氏同
邑永和人

心田記

新安章貴安與余同年生同年第尉吾州萬安氣槩偉
然其文浩蕩奇崛詩又深古多興託有苦外之味而又
能琴能騎能射能發擲不畏勢急義不量力皆吾所不

敢望獨一事差不吾及蓋吾雖不能而能不為而貴安
乃不能不為是可恨耳然遂有議是公不少審細喜犯
難者余笑曰為貴安謀則欲其毋犯難為任事謀則又
患其却審重耳今夫平居議文法不合不過罪去然且
人人首鼠無害自營卒有兵革免胄一往之士將以誰
望諸君言持重持重蓋將道抑吾所自能若不擇利不
顧死為天下先非輕何以哉今人尚多責古人古人不
自言已矣臨事乃見余嘗以此對客浩嘆拊髀政亦恨

貴安經事挫折或不免改作今別矣他時何地復見復
如今日否吾豈謂君能有益吾事顧反復之而不置者
千載而下亦有識余之何心貴安號心田徵余言且一
年於此余亦不問是田者名心乎抑心以為田乎獨嘗
恨近年士大夫以口舌為名節亦復不競間獨能數語
自喜不啻出萬死其望報也如施其終身如驕將自愛
不肯復望發天地以來聖賢所為經營出力死不敢倦
者適一酬酢而倦雖其初本無所為者而其究或甚於

好利矣昔者吾嘗行田間見田者俛而耕仰而避吾路也為之怵然止曰粒我者夫子也孰如夫子勤其身以食人而無食人之色蓋吾知愧是人者矣而是人猶有愧也夫地不與吾爭勢而鋤耰及焉夫地不與吾吝力而黍稷生焉夫下於人而能大受者此田是也而此田猶有愧也使田而不春則田為無用使天而不雨則田為無成與此田終始晝與夜而不知止者其天乎而天猶有愧也嘗見一月之間油然而不為雨者有矣一歲

之間沛然而不為秋者有矣若人則油然者未有不自力也沛然者未有不成物也以人救人者心為近心不止於如田也田者有水旱之蓄焉有春冬之隙焉有爾我之畔焉而心之生意則求之而無不得也充之而無不達也意者天為可幾也而猶有愧也則吾心不既大矣乎人能知天地終歲之功不足以易吾心俄頃之用則所以自任者不得不重矣而又反復思之吾心之用則大矣抑吾力能至矣乎其又有能較毫末於天地者

乎而天地猶無功也則是心也豈不愈歉而愈有餘量
愈用而愈有餘力乎夫千萬言而一言盡之吾言之不
給於口類此若千萬人而一人望之吾豈敢以薄待夫
人哉固謂貴安之心有同然者也被閔其田之不熟而
欲其不輟耕憂其田之或荒而勉其寸寸而芸則世之
言心學者與勸農無異貴安名應子

虛舟記

蓋余與方外言莊子虛舟則善矣而未免於觸也士俊

羅君號虛舟余欲與君言莊子乎則君我徒也非無所為者也江湖之舟為貪夫牛馬走晝與夜而不知止其建旗鳴鼓役千夫而從之者亦且與商賈無異而世安有虛舟也人人以其舟游而未有知無用之用忠臣志士臨流願濟與百戰無成僅以身免者獨患無舟耳空江渺然濩落橫楫其於世事亦何情者患而載我適相值而甚不偶然也古之經營天下反覆萬里羈旅飄泊若此者何限今茫然遠想求其渡處不可得或史不盡

載問其為舟則如漁者往矣子胥之逃吳陳平之亡楚
以此脫其生而成千載以至烏江之流涕溇沱之倉卒
至今誦其語猶悲之此韓退之所以重有感於一壺千
金者也今人美前人成事孰知當日之役有元功焉夫
任大勞濟大險而不以為德者舟也是舟也不為利役
隱然與天意合天欲有所為其必自是舟始故余願君
藏之藏之而未嘗藏者虛舟是也君必待之抑余四方
招涉有二戒焉為刻舟嘗募載視其外完物也既載百

罇生焉蓋從者帶索殫於初直虛則整實則陋也今吾
與若皆虛舟也又嘗赴急彷徨絕岸終朝而不能濟為
之仰天太息非無舟也而未有能操之者也是又以虛
為恨也君盛年力學出語英妙有奇氣當能為世緩急
姑為其所以任重載物者而用是舟者則他人有人焉

玉窻記

徑畷仙人徐景說嘗呼吾鄉吟士劉芳潤曰玉窻玉窻
求吾先師吳齋歐陽公記之記未成而吳翁又僂玉窻

悵然中道四望而嘆曰已矣惟會孟也能知二先生意
且二先生有知也其亦必以余請為然也余逡巡靡徙
久之曰余何敢記玉窓徑暇精神筆墨浮動星緯效林
壑如天人獨玉窓玉窓夫君此猶霞子煙子見稱於謫
仙也余何敢記玉窓吳翁暮年絕麟謝顓顧悠然真玉
窓懷抱如欠今神遊超遠寧能知其所欲記者何說此
海內共恨以為不可復得者也如之何其使余獲罪於
西河也余何敢記玉窓玉窓曰過矣有徑暇之詩與吳

翁之帖在子姑證余契左耳余亦惟是淺陋不能知玉
寔者安出亟且取徑畷詩而讀之則王者竹也玉言竹
竹言德也嗟乎君華門之為居甕牖之為業瑤臺瓊樓
想象何許而玲瓏虛白不琢而天四時雪月光徹夜旦
得之披褐環堵之間翫其高明政亦與玉何異獨古未
有玉竹者雖詩人比物無常然聞是寔之名誰能不怪
我知之矣溫其如玉在其板屋人自人屋自屋也生芻
一束其人如玉芻自芻人自人也是寔有竹畷仙玉之

言主人則竹無與也言竹而已則今之居者又竹之賓也
也以竹名窻意者君不可見以玉君從之矣君儵然苦
吟立萬竹間風環鏘然青入編簡視窻外皆玉也而繇
窻外者視之則頽然玉也頽然者亦玉也以君視竹則
竹可見以玉視君則君亦不可見矣不知竹之為玉耶
抑君之在此窻也是其可親而貴又有在寒林勁節之
外者而非夫玉不足以况之矣販語奇甚奇君甚君洒
然若驚悚然如不堪拱手言曰芳潤何足以知先生意

未必先生之意云爾也余曰未也彼植物也君子比之玉焉夫玉亦何貴於斯其塊然者得是氣之精沉淪宇宙鬱為土石幾千百年而一出於中國幸而見佩執於古之君子而其實焉無傳以至今日則吾黨之士有終身而不識玉者矣竹則無不識也使竹如玉則玉不必識也使君如竹則識君猶識玉也玉乎竹乎為之賦淇澳君避而起起而賦鶴鳴之二章焉余笑曰君為玉僕亦不得不落為石

印洲記

安成之劉稱龍雲龍雲之後有集者遊湖南攝新學教授新學者羣山溪酋豪之子弟而教之君為之數年歸而息焉為余言所居上下數洲田間其一面而正圓可二畝強而名之曰印洲求一言為印洲記余筆墨稍暇不能為是洲記也君棲旅踵門日急如爭地待券證顧客之來者所急不在此寧獨取此因客去慨然就殘燭記之吾嘗謂洪水以來山之顛陔滅沒者何限其存而

培塿亦必地之有氣力者耳洲之為物又其細也數千年間不散為飛埃犁為荒田而士者居之則貴而名印使後世聞有印洲余記非茲丘之遭也耶物之得名也皆若此矣孰大孰小何貴何賤士方未仕視造物區區若利吝我安得一旦築壇受之而孰知其不足貴耶吾嘗悲夫為此者之不仁不祥欲銷之而不可得也彼其閱人也多矣其假人也甚矣人於何擇泛然持方數寸好惡肆於人上以擊斷破壞其為利益者不一二而殘

賊可哀未有已也自一命之微上日視印而不得不多事矣是洲也塊然頑然僻陋蓬顆幸猶隱者之無名氏不見爭取子欲持此用之人間耶則吾將前賀而後弔也固非印也使其為印亦何常之有意者非余之所得玩也子之為新學也其知之矣隱几而觀悠然如懷之而匿其綬其尚有不足耶則吾請有以喻子雖天子之相不與易也印至相極矣季子徒以無二頃失其本心今吾苟有頃即相印亦不足貴也相印猶不足貴也況

其下者世道不同人益異見有以與人而涕泣不肯受者有利其斗大殺人以求之者有繫之肘後至死而不悟者今子之專是丘也無官事無天刑忤者弗奪姦者弗竊操之不慄喪之不憂貴為儒者而傳之子孫印之謂矣其尚有不足耶方盛年志科舉聽吾言類不入為彼者恐不免姑為是洲也記之於此洲乎吾懼爾之用於世也

同元亭記

周嗣翁為亭池上池蓮花葉萬柄嗣翁倚風亭欄零露
忘歸慨然曰吾家濂溪公見性體於此矣求余書愛蓮
二字亭上余為改曰同元之亭他日寄聲為我記之余
謝曰君之樂余不能知也而以余心知之余欲以予之
樂言君之樂則君之樂余之樂也非君樂也且余言之
而有合於君者何哉凡天地之間樂者皆生意也生意
日新未知古人當日所見何似而君之樂顧從古人記
之矣何必余記雖謂濂溪公為君記可也抑吾有少恨

恨公鄙我其言曰菊之愛陶後鮮有聞蓮之愛同予者
何人是公喟然為此蓮絕望於我也嗚呼孰知余今之
愛有甚於公者乎吾今雖欲自以為獨邪則又已見笑
於嗣翁矣夫余亦不自知僭風流文獻有之似之故屈
嗜芟平製衣羽嗜茶龜蒙續傳君祖孫相望於是蓮也
而既專之矣我不敢復愛於此蓮我不敢復愛於此蓮
黯兮嬾兮懷之遠矣昔爾先公得謚於先王曰元公余
豈敢謂公之愛同余之愛乎母亦相與有不能無情者

竊獨與公同此元也且公嘗為草言曰此與我同意蓮
猶草也草猶生意與我同則公之愛蓮有在常情之外
者其謂是元也其知之矣圖書本君家物君左圖右書
者玩矣君他日坐亭上悠然默然有會於天地生物之
理則蓮之繁乎吾前者皆此圖也元之獨乎吾亭者皆
書意也光風霽月則併圖與書而失之而君之道從是
進矣嗣翁書來曰大哉元乎吾名愛蓮安得此義并為
我書之

永新賀氏梯雲樓記

余前年衢信道間遇一士頎然超然徒步入京有家僮荷筍輿自隨天雨塗泥盡數日見其行不見其登車余於是歎曰彼舍車自苦殆以筋力著志陶士行之運甃司馬長卿之題橋此其亦各有恨哉問其名居吾鄉人永新賀沂叟也吾以是識之矣後二年沂叟攜其子過余出梯雲諸詩曰吾父子晝讀書是樓也賦詩者識余苦心余笑曰豈惟人哉蒼蒼者其識之矣夫雲也起於

山川其盤桓而上者天半能至此者不息故也然吾嘗
登高山雲之出吾杖屨之下者猶如土灰焉仰而視之
如土灰者復不知其有幾則夫梯是雲者非強志健武
亦孰能至焉叟必勉之昔者是雲也與吾子同在草野
之中其去人不遠及其得於太空也其崔巍結構竒詭
萬狀自以為極矣抑今之所睹有昨之所嘗記者乎太
空無是已外之為雲者衆矣而科第為下叟必勉之抑
子厚云若登梯足愈多身愈高人愈仰之是在科第之

外者也然未離乎人間也造不極詣不止復有高於是雲者焉而峻極於天矣傳曰雲從龍從我者也其何若登天之有

朝仙觀記

以香城山為南華以南華為朝仙觀則自前吉州守天台葉丞相始華蓋者北辰之宇也山之穹然者象之故為望今言華蓋山者何其盛哉初臨川郡有三峯雲間號江西高絕處相傳隱者浮丘公控鶴而上顧嘗約其

弟子王若郭後見於此是為華蓋山三仙翁而所至高
山必有二弟子之跡何蓋昔者之皇皇其師也於彼乎
於此乎未可知故所在而見之也繇臨川遡永豐有西
華山又西至吉水東山為中華繇中華上五十里得廬
陵香城山又高為南華皆二弟子徘徊白雲之地而南
華三峯畧與華蓋山相似其下有忠簡公胡氏居之又
廬陵望也故南華最盛余為記仙姓名不求人知而知
之者曰浮丘公足矣又求公之弟子而不可得則曰是

嘗授詩申公不乃與王子同耶或曰控鶴在老子前與
太子晉同時其授詩亦猶老子二百餘歲見秦獻公也
或曰授詩後有王褒王喬皆列仙傳殆是已殆是已而
郭又未見聞也則曰王之郭也變姓也蓋從兄弟也先
後時代且不可知而知其同姓從兄弟變荒哉乎方之
外而不得而方內敗之也某丘以地氏氏浮丘者不一
世安在其為授詩翁且授詩翁荀卿門人彼知授詩之
為人師而不知荀卿之於浮丘又其師也仙籍多王氏

古今王喬六聾俗庸引舛錯無足證而華蓋山托為顏
魯公記如麻姑者尤俚華蓋者北辰之宇也山如華蓋
可以出雲致雨斯望之矣浮丘先生古之隱者也隱如
浮丘則仙矣自其弟子求之不可得則隱矣與之隱者
不可知為浮丘之役則浮丘矣王與郭且不必問而為
喬為褒為子晉譬千載之後吾知香城之為南華耶南
華之為香城耶於此有雲其下為雨吾不知誰為之雨
則歸之天而天又誰為之也意者其帝也反而取諸裳

衣袞冕焉圭璧焉耳目具而高明者區區猶夫人焉猶夫人焉今吾一舉首而凜然臨之其明威其明畏其比人間南面巍巍乎宮室之鉅麗哉羲皇堯舜氏而天無稱雖有巫陽莫之敢尸而心之精神極其遠想寥陽金闕紫微玉皇崇高富貴備物典策神而明之也若此陋矣天無情帝無形仙無名以帝為主宰則人之也無物者有物也以仙為某某則神之也有物者猶無物也仰而茲山茲仙也猶仰而為天為帝也其不可知也則亦

至矣太山之上有人跡焉曰昔黃帝戰於此聞者隱
然笑之及至山之有崑崙也星之有牛女也招焉指其
過客紀其時曰辨其處所如所嘗睹如家人語古以至
今山不崩天不墜厥亦若有持之者焉而皆意之也憂
其崩且墜者為愚為誕而知其所不可知者為智窮無
窮極無極吾將證之南華而南華老仙復隱然笑之悲
夫吾聞韓子之論山也曰最遠而獨為宗其神必靈余
避亂方山之下天大雪望香城雪倚天照日如峩嵒西

其中峯高大人指之曰朝仙觀也王玄洞其左郭公巖
其右蝗旱禱焉天燈出焉道士鍾允升掌觀事與其師
張次良焚修祝曰惟宋萬萬年子子孫孫惟王永作神
主自有天地不知何年此山為香城香城生忠簡以匹
夫捍城郭以編修官按宰執吾所知者其靈以此其最
盛以此星淪嶽踏南北壅隔近年始宗華蓋福華者無
不在則如忠簡者尚有人也是為德祐元年吉州南華

山朝仙觀記

虎溪蓮社堂記

方山在青原東，東西瀧江出，其左右村。江其右，方山之泉出山下，山東為峽，委蛇循峽左右，赴二江，是為虎溪。元年冬十二月，余避地虎溪，主蕭氏諸君幸哀我，館且穀我，余惟世方亂，蓬累而行，瓜牛以居，揭揭焉載其木主而無所可祭，一日步行田間，得精廬，曰蓮社，欣然蹶然就而臘焉。社友十餘，中堂高潔，佛祖咸在，道人覺就可晤語，請記。余謂道人蓮社本遠，公廬山廬山前則

亦虎溪也遠送客未嘗過虎溪謝靈運求入社不納而往來淵明山水隱映醉醒兩相得非以其徜徉方外世味薄耶淵明為叅軍六載縣八十日余塵居寡諧非無意斯世名穆陵進士十又五年獨嘗教授中都百六十日罷又三年起從廬山公江東七閱月從江東得掌故入修門四十五日以憂歸歸又七年而當德祐初元五月召入館辭未行十月除博士道已阻歲晚自永新江轉入虎溪留虎溪三月矣十年之間仕已如此去年廬

山公以節死謚文忠惟余與同年蕭獻可皆公客相對
感念離合出處流落惟師友之故而余尤以貧似淵明
獨誦其詩辭百世下彷彿求一語不可得以此愧恨天
其以余畸於彼而合於此牽帥山水至此逋播耶何虎
溪同蓮社同道人相得又同志為此堂記甲子則余與
淵明命也亦本無高處正自不得不爾八表同昏平路
伊阻誦停雲此語淚下露土何能無情此堂起咸淳二
年靜觀居士蕭公某創為之獻可其弟是年為德祐二

年二月戊午社

鷺洲書院江文忠公祠堂記

故大丞相贈太師益國江文忠公古心先生祠鷺洲侑
歐公已卯曹山長奇所作也於是謚文忠四三年矣廡
廩荒涼矧暇俎豆至曹君始有意教事以及乎此祠成
聞者垂涕先生慶元戊午遭偽禁之世父師竊竊傳
習朱氏處白鹿遊東湖所交多考亭門人出入端平諸
老其為吾州年四十有三聲名德業高邁前聞故能創

鷺洲如白鹿深衣入林媚映前後無不心醉名理然所
聘不過十數名士而縉紳德之吏民憐之悍卒化之去
之四十年賢侯健吏其何不有同時父老化為異物而
識與不識曰古心古心如昨曰江檢詳者亦如昨豈惟
吾州士論勝而民俗厚亦先生之流風繫人心能使其
沒世不忘如此也蓋嘗痛名賢之在天地間如風雨其
變化及物關繫晦明也極其所至曾何足以當俄頃之
運而鼓之動之沛然如出乎六合之外者聲也雖復身

數朝家累世壽考且百年之久而又能不殄厥愠不隕厥問以有成也要亦如風雨過之爾而讒者敗之忌者離之不肖者塞之當先生之盛年則有不見釋於鄉人者矣藉第令其人亡恙亦誰復比數而先生之所存每抑而愈彰已遠而彌長者聲也計其三四起家直出於讒者之疏忌者之遠不肖者之隙復何能遂其志行其道展其四體而聞其名者願其有所成諒其猶有餘蘊雖善不足以相及而猶欣然樂之者聲也凡大人之行

其聲宜如此也先生間居其志念在國家其精神在廬陵徃從班時嘗問葉西澗廬陵曾得士否因為言布衣數士環堵水竹間意西澗退而歎曰吾至廬陵夢耳咸淳初發德音欲求諸儒之後時宰以先生自建來主朱氏先生奏曰臣在建安收獎朱氏備至今世所少惟節義有以死易節而子孫僅得一澤後遂不振絕望者以臣所知近年廬陵胡夢昱可念也錄是廷評後得擢用又議謚廷評忠公不果其用意類爾即增貢額減歲糴薦

進除目或用或不用常事無足論迺其經世則有大願
矣再相再不合嘗嘆平生志氣之樂惟鷺洲一事過江
百年仁山字水人自為士然學校科舉終有愧於道孰
能學校科舉外而求志又孰能因學校科舉而成之自
鷺洲興而後斯人宿於義理自鷺洲興而後言義理者
暢又不惟文字而已而後學者知矯其質習存其氣象
又不惟氣象而已而後立身名節一以先生臺諫為風
采推論人才長育之自斯文一變而至歐公再變而至

先生而先生又以身徇宇宙與之終始雖康之山番之水同光而共潔而其道隱然增鷺洲之重與歐公而並其好士似歐公論諫似歐公變文體似歐公而又得謚似歐公受鄉人毀似歐公歐公老潁而先生祀吉老潁者有所避而祀吉者以其思嗚呼豈偶然哉方其為鷺洲四方書院未有萌其後徧諸賢論建實始此顧獨嘗有遺恨欲修鷺洲仆前碑為續記雖未能知其何意然昔者吾見其考亭書院記矣曰如以名而已窮山空谷

袂屬肩隨人以為此學之盛而由更事者旁觀而竊嘆
乃不如昔者退學於偽禁之時信之之深而得之之實
也則吾亦為世道隱之於心久矣然則續記雖不作可
知也意者其在斯乎某事先生十有五年日所見之猶
史獨為廬陵言則言之先生玉立如山和氣在眉睫間
如柳聲含弘如量登斯堂望二公者不知山川之氣何
時而復生而又安知其不共天風而下也

南康軍昭忠禪寺記

往余從廬山公於綠野門徑蕭然望春流數百步外樓
殿莪莪舊祇園寺也時公罷政府國朝恩例厚臣子寵
靈其先則即近寺賜功德院改寺額而公之先太師墓
距今第三里而近故祇園至是為昭忠昭忠云者景定
元二間也余往還日涉獨未嘗過溪一至所謂昭忠者
謂當崇麗大刹也後十有八年以負土之役再至同野
徘徊且久步昭忠落日及門門廢升堂堂壞風廊雨立
僧飢佛黛旁無寸垣光際湖外蓋戎馬劫灰累年於此

必盡廢乃止會公之子鎬說衰入燕有蜀僧文舉從之杖錫北來望昭忠佳焉余勞苦之曰自上都過河涉淮渡淞江歷重湖可無愁絕勝處過此耶舉笑曰吾惟慕文忠名賢以至此也且北方隆震旦以此他日鎬以書來求記於余曰甚念昭忠蓋名為功德之舊而不敢忘既舍田若干又助財粟若干重修某某願有記余以所見荒涼驚異歡喜即為之記不待攷爾時祇園且安在徧大地佛身則祇園在彼猶在此祇園在此即雙樹亦

在此然是園也昔者無一椽一瓦一草一木不知何人
辛苦自營乃能積日幾年重樓複殿撞鐘建鼓長廊高
座千燈分譜萬法雲會遂為都昌禪林彼此比於山南
山北愈小見尊則浮屠之業極此矣孰知數代之遠百
年之後鍾為異人起為名家貴為元宰壽為耆英死為
姱節乃在東家之近培樓之旁方其退然與樵夫野叟
樂阡陌守墳墓過長門而不入豈嘗睥睨及此而昔之
為此者乃若與國家中興氣數名節合而有待又何其

盛也嗚呼吾欲以前日為盛耶則盛者若此矣吾見馬
蹄獸跡梁室木壞龍象淒然雖昭文地宅林殘礪絕升
其堂者俛今仰古人亡迹熄而流涕繼之矣夫其盛也
若此則今之修者其於木石之間山川之外猶足久存
耶是雖世外之人無與於得喪而悲傷感慨終已不能
無情者以此況彼得不謂之愈衰耶夫其衰也雖欲復
為祇園不可得也以吾之盛者托於彼以子孫絕續為
不足恃以君臣會遇得於丕顯休命為不世又以大文

之可傳者為不朽萬一其出於荒田野草猶可以有攷
於此也悲夫法法有壞昭忠之忠也不磨不磨則不係
於祇園之廢興必將與文忠為終始凡天地之間忠臣
孝子人心天理其或者有攷於此而有所不忍廢也則
斯文也其亦不可以已夫

歸來菴記

歸來者古心先生石山菴也先生生於林塘老於同野
死於芝山之下死而不死者在宇宙不死而死者人心

是也嗟乎歸來乎歸來乎四方上下其何歸乎昔者聞之大禹曰死歸也歸有幾有戰敗而歸者有去家愈遠喪其所挾而歸者有呻吟中路流離悔恨而不得歸者有赴蹈不顧毀傷其面目者有優游卒歲全名於牖下者歸有幾嗚呼人謂之不死奚益東坡謂延州來季子庶幾不死然終春秋之世餘皇姑蔑之不返甬東秦伯之不祀復能蕭然人間若無意於去來者則吾亦不知其何心蓋不死而死者人心是也悲哉是菴為先生之

所手築意其寃魄猶不忘是間臯復之道於此乎
於彼乎未可知乃作山中歸來之歌作歌者誰先
生之門人宋玉也歌曰臯歸來兮山之陽高冠青
雲兮擁白露以為裳遇子卿於盛漢兮十九年而
牧羊天荒荒兮日星無光地茫茫兮兩乳雷琅瑩
篔簹哀兮湘瑟御過平實兮玉堂臯歸來兮山之陰
而為閣兮宮沉沉清風時至兮芳草滿林山空無
人兮援啾啾而夜吟父前而弟後兮熙春載臨忽

相顧以流涕兮又痛哭而不可禁彼紫芝之垂絕兮遺我哀音菴成於某年月日記成於庚辰十二月

靈應廟記

凡方社數姓之祠甚明著尤異有功於當世羣望不偶然天高也而難攀人近也故易求其理一也舊見杭叟言賈平章故狎遊嘗深夜密期竊負出巷口遇隣老人止之曰公年少貴極未可量何玷累至此賈愧悟返之

肆及明視其地里廟也因自喜及武昌圍城中拜右相
呵道巡城曲見小廟礙車止曰夢是矣城隅夢其自道
若平康巷肆則余猶及見其既相後所飾新廟廟淺甚
人之未達亦何所不至神不能與人所無而急人之病
導人之善為人所歸徃尤近尤信不必有封爵氏號泊
然出於盛心感動本無求與無功而物之為報自有不
能忘者里將興神必靈陳寶之鳴大橫之兆竟亦不知
其何神而存之後世異哉此圖志之所不敢遺岳瀆之

所不能效也吾巷曲以西為靈應王廟直三巷口廟丈
餘甚古崇之者香炬嘗接晝比年前亭後館敞於鱗迹
之所不容斥又盛園相顧求記或曰凌王姓或曰歲夢
某某應或曰廟褊矣余惟混濁隱約之中數步之近如
夷門生市南僚鄭弦商陶朱公友類耳目所忽不意而
解紛救難如神明者人事常有之況名為神建為廟而
求記是者非嫻友則里人也復何辭何擇之有

汲古堂記

汲古堂者宋公子諸生國學之堂名也嘗有井故云德
祐鼎遷堂廢又七年學燬而鉛山前釋褐進士趙嗣德
以其重修大義橋之寺之井之堂亦名之曰汲古汲古
者又過江初邯鄲賈逸祖所自號也先生則嗣德之祖
之友南來依於趙於寺學焉賦焉死而墓焉章泉趙蕃
表之曰宋詩人賈元放者是也至是祖而配焉又取諸
章泉配焉登斯堂酌斯泉者低徊喬木之下如過周墟
觀魯廟無不仰止其名而憐傷其意復求文於余以記

之余為之長太息曰莫古於天天者不平之積也由今言之亦孰非古也第論前日我我堂下安知其至此其至此無怪也南渡百年姦臣擅者五六久矣夫福威之不惟辟姑為君宗袞而言之毀金滕被霜露間居聞問之黨遍天下當其時非聖主意也凡拂天理負人事寧獨此其平世所謂敵國者直彈擊文致口語而已流恣於近年班朝綠野愚寡冲如黔首冤怒激極震電橫彗誕取前史所謂宦官外戚藩鎮權臣以為是反復迭起

不可解之宇宙者一反手而勝無遺而古有不足為矣
吾嘗嘆夫日所見之猶史或言與事悖事與情異頗疑
文字以來欺世也皆若此其為蒼蒼冥冥者忿而欲塞
務使能言之類亦如其不能言而古有不足信矣今予
之讀書是堂也其能得夫世外者而志之耶其亦不免
於傳聞所傳聞也悲夫子亦知之乎古之所存者今不
必有今之所有又古之所無也古猶汲也其陳乎吾前
者或廢或絕則或地下者有之耳故冢之書泗之鼎峴

山之石參差零落出於千載陵谷之有待然而汲者希
矣古猶汲也必竭而後新今吾雷同諸老之後常一經
而百傳復欲舍是而圖之則必僭先賢而背師說雖童
子亦且以為不可然而汲者新矣直心盛年高尚甫得
一第即唾棄歸而養志此其中有大過人者斯堂何許
宛其麟止儻能得夫元放章泉之為友攬古所謂不平
之恨肆而評之當有出於衆人之所不講是為汲恨吾
不能贊其志徒想見斯泉於重湖之上萬山之外寓焉

言之發其微而止抑惠山如海發於夢寐有寺僧者謬
之曰在是則在是矣是得之華池者猶惠山也亦所謂
汲也則吾與子得不已相見於此堂與直心惠字也友
元放者其曾祖贈金紫彥孟也友章泉者祖龍圖充夫
也橋縣北寺橋北橋寺一新橋最鉅

生意堂記

士不願為相願為醫自吾所見異時賢相或薦士不達
相與歎息憔悴而止盡日坐政事堂署吏牘無一如志

然不得退下至州縣獄事或銜竒取勝或偏闇遂非屢
爭而氣塞頃嘗建議分畫數道報聞既事壞思吾言欲
行之已無及世事大謬類此遂使人思里巷倉卒投一
藥治一病奪命頃刻之間獨行其意無求於人受托專
而成效速惟醫道最善亦最樂而少不習此數年間坐
見陳元吉醫名起活人衆家世興而吾等腐儒從昔無
用愈至是決矣余亦欲為元吉而不可得也日婦病甚
賴元吉有瘳元吉間出諸公生意堂說相示復有以觸

余心焉因從上記之醫書言手足痿痺為不仁今之不
仁者非手足痿痺之謂也而心死矣其人康強飲食富
貴壽考而若存若亡若宇宙無與我事則其形雖具而
心死矣幸而沉昏廢錮之中有一二焉若穎之有泚而
其歸亦泚穎而止是其存者雖異於衆人而少焉忘之
亦衆人而已矣吾前所以落落難合於世者以其無生
意者心死故也天下未遽有不治之疾也若此者不治
矣故夫子曰殷有三仁焉悲夫天下之無生意也久矣

三百年間周茂叔之不除草張子厚之聞驢鳴槩以為
觀生意於此孰知神農之所嘗千金之所授樵夫野人
之所挾其於紓疾痛延時命有大於陰陽寒暑而儒者
以方技略之昔者吾嘗志斯業也以事親濟人已矣惟
節飲食審藥物以自救晚得元吉精意善治如此實資
以安老而又甚恨於不如盛哉元吉之用心也蓋彼失
而此得之皇皇乎其三吐三握之盛也優優乎其一貴
一賤之交也儼乎若屬之神明其無私德忤乎若飲之

有量輔欹器而早正之也方卧者憊於床狂者渴於井
號呼靡及水火互至骨肉圍視欲絕越人者固非能使
死者起也然及其倒垂仰飲俄而顛眩失壅泄道蹂擾
平不震不徐舉目意會於凡情之表古方法之外蓋病
家以為更生而吾術以為常事每誦當今人物眇然蔡
公委篤之語此人事之所不能齊造物之所不能及也
非夫生意之尤大者乎而元吉足以領此且其事親孝
兄弟睦有本如是鷄鳴而出暮而歸雖其勞不啻而思

所以及人者無憾則其樂亦不可言也夫余亦欲如元
吉之一日而不可得也獨喜談而樂道之且以信於鄉
人士大夫云爾

濟菴記

自易簡方行而四大方廢下至三因百一諸藏方廢至
局方亦廢亦猶中庸大學顯而諸傳義廢至詩書易春
秋俱廢故易簡方者近世名醫之數也四書者吾儒之
易簡方也安成謝清叔療病能出入諸方而加以巧思

嘗試之奇驗他日以濟菴記為請余亦喜言之因謂謝
曰子知濟之為義乎醫不止於如濟也山窮路斷江空
日暮雖人情所甚急亦必有不盡急者固未離乎岸也
瞰焉而不得濟則已爾少須待之終亦必濟未禍也若
夫中流失船浮沉托命而邂逅漁者亂渡援手則天意
也其更生之日也陰陽之薄人也害於溺而人情之忍
死也甚於浮皇皇而拯之猶懼不及而貪夫嗜利暮夜
不忘或珍而後市或亂而後掇懷鍼厲石存變留行此

曹氏所以撫床而呼韓醫所以望商而敗也故善舟者無不濟而濟有遲有速則必有不濟者焉謂人命之不足以有待也悲夫蓋嘗疑孫思邈之捄髯病也彼龍也而求吾急斲而返諸其室焉曰此有秘方吾欲得之返而獲獲而見捄其亦甚矣龍之為病也不死人則有不堪者焉賴其利也利其方也其方之足以利人也則其持也乃所以為濟也龍者有方不自捄而斲於孫則孫之治是病也必有出於是方之外者矣彼亦自以為秘

矣而孫實知之則龍之智不智於孫吾惟懼夫後之急者無龍之藏有龍之病而求龍之所不能求則濟者寡矣於是清叔笑曰幾見夫舟之濟也倦於人又幾見夫舟之濟於人也德於色余謝曰君進於技矣他日得夫龍者而拯之是龍也能濟於天下是亦子之濟也清叔曰吾能吾濟而已安知其濟天下也使吾望是人也而濟之是有澤余曰然博施濟衆豈能博且衆哉無心而已無心博矣濟其一濟者衆矣子乃能濟衆我不能病

諸善夫

本泉堂記

觀於水曰觀海極矣其善論六合之內者曰未之海也
非江河雜流百川灌輸不至此而其為雜流灌輸者亦
末也故三王之祭也先河而後海謂之知本雖然近之
矣其猶未得為本也嘗觀於瀑焉歆而忽者不知其幾
千百尺若有馮怒憤絕其洄可立而待而自天地以來
震蕩傾動已若此矣是必有為之本者也循流而上聲

勢漸遠俛而視之汨汨行未數里如有而無仰而得之
涓涓其冷然投谷如相爾汝向之霆驚魄悸者非爾也
耶而亦不可得而進矣因悟天地之初人物之理其繇
綿若存者類此達之為灑灑捍之為龍門闡之為汨為
灘奔流萬怪不可注視凡涓涓者其祖人能不菲薄暴
棄則身之宇宙亦豈小哉吾言本者如此或曰是本也
又孰為之本也則吾前所謂繇繇者是已陰陽之浩然
也無窮而山水之行世也如往人見其往也而不知其

浩然者常在是也夫是泉之本也江也海也本於泉是
泉也本於氣或曰泉之下也為江海其不為雨乎其必
江海而後能雨雨復為泉乎則夫泉之本也在是矣曰
近之矣其猶未得為本也夫氣之感也未有不本於人
心天地之間者心也悲而鼻為之酸痛而目為之泣雨
者天地間之惻然者也一勺之水或藏蛟龍非藏蛟龍
也惻然者為之也故能往能來而時出於天其變為旱
而常也為潮昔者孟子謂雨無本雨無本本於泉泉之

為雨本於心吾廬陵遡贛江而上富川出值夏為忠簡
公鄉又夷道三十里得富川為文山文山之友鄒氏次
清鄉人稱鄒長者其曾祖長者厚益公既為平園嘗以
其餘返鄒氏不受則植莊鄒公橋示報道橋與莊一不
朽士兩賢之同時往來誠齋父子番洪景廬學士近年
曾無疑隱者代為銘詩顯其世次清又梵夷道者振孫
其孫好義如次清為堂曰本泉求余記余字振孫曰慶
元前陳者皆其本矣尚無忘慶元少年清修意趣非凡

究而川流感而天雨將淵然由此堂起是能味吾言者
吾言亦復未盡舌根有泉

休巖耐隱記

羅君伯雨起童科貢鄉漕當景定盛年諸老先生喜其
才欲真館閣不果退居竹村號竹村世亂更名所居扁
曰休巖曰耐隱或曰休者其誰歟隱者其誰歟而何此
君之不一也余曰然是或一說也且不耐非休也亦休
故耐耳農圃代耕再易所獲當不與旦旦分寸者等

雖天地冬春之故生物熾然日新日化而不知其休久
矣雖一日之間東西代起行三十七萬八千里而所休
亦稱是矣人身天地之元氣於其間一日一時積而不
可勝用雖建功立事之日月人人有蹉跎之歎而優游
與蹉跎異正自不得不優游者由潛至躍一飛一踣蓋
重耳十九年子胥六年句踐二十年其間雲雷之屯風
雨之變可悲可喜可生可死回視俯仰之間而成敗得
失居然相遠安期生與居巢老人同時干項羽老人中

道憤發背死而安期以不合去而長存是又在九州之外功名之表可以掀髯而笑矣彼夸父渴張毅熱臭而死何足道就其高者計之人生百年有早休者中休者晚休者晚休少耐中休又耐早休又甚耐人亦何能自知其為中為早如陶淵明杜子美陶弘景賀知章槩中年知止而自其初終計之則亦晚耳嗚呼龔生遂夫天年之數人者皆老於世故恬於世味早休後死所得不既多乎其不又耐乎或又問曰如子之言是自古至今

無一人早休者皆暮矣奈何余曰不然太公年八十居東海之濱是早休八十年者或人笑曰七十九而釣不可不謂休矣八十矣舍釣而從之亦不足休乎鷹揚展轉迨夜行秉火以趨齊則九十餘矣而不休亦未可以休乎其休猶後此乎我以其老而不休而子且以為早休余曰不然子能八十不求用乎自其少年以至八十而不求用得不謂早休乎此其所以耐也子徒知其夜而赴國之行暮而不知其疇昔磻溪之日長也休乎彼

不休乎此非不休也耐也耐耶非耶或者喻曰子之况彼也遠矣然則以為竹村壽可乎曰可

廬陵縣學立心堂記

余年十三以童子試縣學堂上後十年而進士第一者亦於此噫其如夢耶當其時堂跂跂集不可一布武講於斯食於斯後偪縣丞簿解隣囂爨其左啗分寸不得入每霖溢溝浸無可泄亦百年於此盛時美宰園顧無策僅疏為樓窓數尺飛雨霑屐比年邑改是贅梳者尚

不廢墜而教諭鼎來廩空而客去況有能議改拓迨蕭
渙可至獨慊然陋已起而圖之則向之丞簿廨莽焉已
久屢請僦回復歲餘而後下溝塙餘五丈廩既荒度而
老兵居之僦之不可棲之左已而廢寺熾然有禪居僧
履契齒而脅新安學田將奪渙可指學碑辨危而後定
而工役亦少間矣興造未易為也難又若此吏且接踵
而向之役既而不休斯堂比進士第一高深倍廣稱益
鑿而築之三尺翼以雨窻然後席函丈餘然後池雨四

集然後取樓窻西之為藏書易米廩為小學觀者環迴
不獨櫺星之新其外也渙可曰吾為鄉校不可以累後
人一以已力任其費惟是櫺星小學等成終而會渙可
復以其奉廩不足諸生感曰此悃悃復為誰事請各效
供奉餘足焉由是不毫髮掛簿責有贊有歎無敢間起
丙申冬終求堂名予命之立心是日也揖諸生而進之
曰學何為也政爾不為抑復誰能彊此自有天地而斯
人立焉斯人天地心也其心天地者學也伏羲堯舜氏

作而後人得其所以為人者伏羲堯舜氏不作而立焉
者私淑於曲阜之匹夫自曲阜千年而天下為學校之
天下以至今日邑無小曲阜是也學無小伏羲堯舜氏
是也洪水汨陳三光五嶽之不得其寧禹以胼胝為平
成功當是時也天地託之禹師尚父之所經營父師微
啓之所歸往而獨首陽之子戚然其間為綱為常當是
時也天地託之夷齊春秋者山林誅討為尤難於一聖
二賢而接乎伏羲堯舜氏以垂萬世然微言絕而邪說

塞孟軻氏以聞知闕之廓如也當是時也天地託之孔孟俎豆之絃歌之雖存乎寥廓而天下以學不學為治亂人亦未嘗不以不學為其耻向非隱然者檢而律之則遊梁而困者皆為儀秦讀城旦書者皆為鞅斯封君侯王皆為五霸而功利與刑名交騫於世民之黔赭其不鬼魅幾希黨錮清流雖無益於存亡之數然此風不競將宦寺小人皆迭執其柄斯人者雖不幸乃其心則布之天下國家矣故嘗謂韓歐當平世宗辨拒邪又在闕

洛之先楊墨之外為學校功宗皆所謂天地立心者也夫庸人者不足以為天地心矣異氏者不足以為天地心矣千載一時科舉廢而學校興學校興而人材出故學校又為天地心之心也予也若昔堂下之童子也豐碑在刊忠節如前蓋荏苒衰遲而有道德初心之愧故於斯堂也始之喟然終之喟然渙可名渙時同官趙時第前職周適道朱介實相成之

欽定四庫全書